



La Pro Grigioni Italiano è fitg satisfatga da l'elecziun da la presidenta communal bergiagliotta Anna Giacometti en il cussegl naziunal.

MAD

La Pro Grigioni Italiano è sa radunada

DA GUIIU SOBIELA-CAANITZ

■ **La Cuminanza grischuna da lingua taliana vegn a sa regardar gugent d'insaquants eveniments da 2019. La gronda e bella surpraisa è vegnida ils 20 d'october cur ch'il pievel grischun, cun 6932 vuschs, ha elegì la presidenta communal bergiagliotta, Anna Giacometti, successura da la Puschlavina Silva Semadeni, en il cussegl naziunal.** Er il novelegi cuss. naz. *Jon Pult* è da lingua materna taliana. L'«italianità» retica resta pia represchentada en il parlament federal. Tant pli en il parlament chantunal: Dapi il settember presidiescha il Puschlavin *Alessandro Della Vedova* noss cussegl grond. Quest onn ha il cussegl naziunal ina presidenta italoфона: *Marina Carobbio Guscetti*, doctressa a Roveredo, sesenta a Lumino, vischnanca tessinaisa limitrofa dal Mesauc. Avant decennis ha l'autur da questas lingias udi in detagl curius en la regiun da Blinzuna. La giuventetgna dals vitgs enfin a Biasca fascheva gugent beffas da quels da Lumino: Lezs numnian lur vitg «Lumin» empè da «Lümin» cun il bel «ü» tessinais. L'absenza da lez vocal palatal è propi ina noda dal dialect «mesochin». L'artitgel «Dialect de la Val Mesolcina» (Wikipedia, grafia milanaisa) tuna: «El Mesolcines l'è parlaa in de la vall che ghe da el nomm (Canton Grison) e'l ghe da ona qual influenza anca ai dialect di paes del

Bellinzones l'arent (per esempi Lumin o Arbed-Cagion) (...). La manca il [ü], che l'è sostituì dad ona [u] o dad ona [i]: Mil[anes] 'pussee' = mes[olcines] 'pissee'».

Glischs e sumbrivas da 2019

La Pro Grigioni Italiano è sa radunada a Cuira ils 9 da november cun il parsura *Franco Milani* e la secretaria generala *Aixa Andreetta*. Milani ha fatg endament il Premi grischun da cultura concedì a *Sacha Zala* (Universitd da Berna) da Brüsche, schef dal post da perscrutaziun «Documents diplomatics da la Svizra», per sias perscrutaziuns istoricas e per sia activitad da plis onns sco parsura da la Pgi. Dentant ha Milani era stuì crititgar «la deplorable situaziun da la lingua taliana en la regiun Malögia [Engiadin'Auta e Bergiaglia] en violaziun evidenta da la Lescha chantunala da linguas, malgrà la preschientscha d'ina vischnanca italoфона e d'ina vasta diaspora repartida tranter tut tschellas vischnancas.» Il parsura ha lura fatg endament che la Pgi duaja negoziar 1920 cun il chantun cunvegna novas da prestaziun. Cuss. naz. Carobbio è gist vegnida elegida cussegliera dals chantuns ils 17 da november cun 36'469 vuschs. Tgi vegn uss en il cussegl naziunal sunter la novelegida cussegliera dals chantuns? E tge capita cun cuss. fed. *Ignazio Casis*, l'unic represchentant da l'«italianità» en nossa regenza federala? Tut quai vegn ins a savair per il temp d'advent.